


CELEBRACIÓN EN OS COTOS (na igrexa)

11-12 de febreiro do 2023

VI ORDINARIO A



OS COTOS COA IGUALDADE VERDADEIRA DAS PERSOAS,
COS POBOS QUE SOFREN INJUSTIZA E ABANDONO,
COS REFUXIADOS E MARXINADOS DA SOCIEDADE,
COA NATUREZA MALTRATADA,
CON RESPONSABILIDADE COIDADORA ANTE A COVID-19
E SEMPRE SEMENTANDO PAZ

CAMPAÑA DE EMERXENCIA TERREMOTO EN TURQUÍA E SIRIA



1.- ENCONTRO DA COMUNIDADE

(tod@s de pé)

@ monitor/a está na sé

SAÚDO DE BENVIDA

♪ nº 3 *Unha xuntanza de amor* estrofa 1

Celebrante:

Benvidos sexamos todos a esta celebración. Reunímonos para compartir en comunidade a nosa fe no nome do Pai, do Fillo e do Espírito Santo.

Deus fíxonos libres para escoller e tomar decisións na nosa forma de vida.

Esa liberdade lévanos a que poidamos tamén equivocarnos ao non tomar unha decisión axeitada en todas as situacións que van xurdindo ao noso arredor.

“Tedes oído ... pero Eu vos digo”. Xesús invítanos hoxe a ser responsables da nosa vida de fe, a medrar na nosa liberdade e a escoller o camiño que El nos marca coa súa Palabra e a súa vida. Fagamos do Evanxeo o noso libro de ruta no seguimento de Xesús e no trato coas persoas que comparten a nosa vida.

Hoxe non nos equivocamos se nos achegamos e compartimos os medos e as dores de todos eses pobos de Turquía e Siria. A nosa fe só pode ser crible se é solidaria.

ACTO PENITENCIAL

Celebrante: *A vida de Xesús demostranos que nós non sempre tomamos as decisións acertadas, e ás veces o mal, o pecado, a ruindade aniña no noso corazón. Agora diante de Deus e dos demais renovamos o noso esforzo por facer mellor*

Monitor/a

✓ Dános, Señor, azos para actuar con liberdade á hora de tomar decisións achegándonos ás dores de Turquía e Siria. Señor téndenos a túa man

✓ Dános, Cristo, capacidade para non deixarnos guiar polo egoísmo, e medrarmos achegándonos aos que o perderon todo. Cristo téndenos a túa man

✓ Dános, Señor, criterio para tomar decisións maduras que nos axuden a medrar como persoas, e coas que axudemos aos que necesitan empezar de novo. Señor téndenos a túa man

Celebrante: *Deus todopoderoso teña piedade de nós, e dos que teñen un lugar na nosa vida. A todos, o Señor, nos conceda o perdón dos pecados e por Cristo Resucitado nos leve á vida eterna. Amén.*

ORACIÓN PROPIA DO DÍA

Celebrante: *Rematamos a primeira parte da celebración presentándolle a Deus as nosas preocupacións co desastre de Turquía e Siria.*

(Silenzio)

Celebrante:

Deus, Noso Pai, ti prometiches estar sempre naqueles que te aman con corazón recto e sincero.

Fai que a túa graza nos axude a vivir de xeito que merezamos ser a túa morada.

Acóllenos e concédenos vivir dando sempre unha man aos demais.

Así o fixo Xesús, e por El, pedímoscho a Ti que vives e reinas por sempre eternamente. Amén

2.- PROCLAMACIÓN DA PALABRA DE DEUS

(sentad@s) a palabra de Deus proclámase dende o ambón

No Leccionario I– A páx 192 Sir 15, 16-21 LECTURA

LECTURA DO LIBRO DO ECLESIAÍSTICO

Di o Señor: Se ti queres, podes gardar o precepto, facer a súa vontade é sinal de intelixencia.

Puxo diante de ti o lume e maila auga: bota a man ao que prefiras. Diante de cada home están a vida e a morte: o que anceie, iso daráselle; pois grande é a Sabedoría do Señor, El é potente e egrexio e todo o dexerga.

Os ollos de Deus contemplan as súas creaturas e El penetra as accións de cadaquén. Non lle mandou ao home que pecase nin deu pé aos homes falsos.

Palabra do Señor

Celebrante *O evanxeo que agora imos escoitar é a proposta de Xesús por un mundo mellorado. El non se contenta co que sempre se dixo, El trae un novo xeito de vivir.*

(en pé) *No Lecc IA páx 195 Mt 5, 20-37 EVANXEO*

PROCLAMACIÓN DO SANTO EVANXEO SEGUNDO MATEO

Daquela Dilles Xesús aos seus discípulos:

Asegúrovos que se a vosa xustiza non é maior que a dos letrados e fariseos, non entraredes no Reino dos Ceos.

Tedes oído que se lles dixo aos vosos devanceiros: Non matarás, e quen mate será reo ante o tribunal. Pero eu dígovos: Todo o que se enrabeche co seu irmán será reo ante o tribunal.

Tedes oído que foi dito: Non cometerás adulterio. Pois eu dígovos: Todo aquel que mira a unha muller casada con desexo, xa cometeu adulterio no seu corazón.

Tamén tedes oído que se lles dixo aos devanceiros: Non xurarás en falso, e cumprirás as promesas feitas con xuramentos ao Señor. Pero eu dígovos: Non xuredes nunca.

Falade, logo, deste xeito: "Si", cando é si; "Non", cando é non; e todo o que pase de aí vén do Malo.

Palabra do Señor

(sentad@s) gardamos uns instantes de silencio para acoller a palabra no corazón

A TERRA TREME EN TURQUÍA E SIRIA OS CORAZÓNS CONMÓVENSE E AS MANS TRABALLAN

Ante a situación dos danos sufridos polos habitantes dunha ampla zona de Turquía e Siria non quedamos impasibles, senón que, o latexo do corazón e as emocións que xorden chámannos a preguntarnos “Qué podemos facer?”.

O primeiro e inmediato é unírnos afectivamente á dor e ao loito que están sufrindo estes irmáns nosos. Un afecto que conmove as entrañas. A oración polas vítimas e as súas familia é a primeira resposta porque cando un grita, o Señor escoita, está cerca dos doídos e comparte cos que están abatidos.

Desde Cáritas Diocesana de Tui-Vigo unímonos ás axudas en emerxencia que se xestionan a través da coordinación coas Cáritas locais. A nosa colaboración debe ser encauzada coa rapidez e a eficacia que esixe a situación. A aportación económica chega con maior fluidez ás Cáritas no territorio que xa están asentadas e traballando.

No caso de **Siria**, el terremoto afonda o drama dun país que arrastra desde máis de dez anos unha guerra civil

que deixou medio millón de mortos e máis de seis millóns de refuxiados.

“A primeira resposta está centrada en habilitar centros de refuxio para dar acollida ás persoas que perderon as súas casas. Ademais estase facilitando comida e sobre todo abrigo, xa que as persoas fuxiron dos seus fogares co posto”. Son palabras de Bárbara Lorenzo, do equipo de Cooperación Internacional de Cáritas Española.

Ante o devastador impacto dos terremotos, as Cáritas nacionais que operan en ambos países alertaron sobre as dificultades que teñen no terreo para recibir e distribuír axuda en especie. Este tipo de axuda é moi complicada, polo que se prioriza a entrega en efectivo.

Ante esta dramática situación, Caritas Española expresou a súa solidariedade e cercanía con Cáritas Turquía e Cáritas Siria e mobilizou unha partida inicial de 200.000 € para apoiar o plan de resposta.

Non podemos permanecer ao marxe de tanta dor e sufrimento. Con Cáritas de Tui-Vigo estamos convidados a cooperar.

PROFESIÓN DA FE

Celebrante Neste encontro parroquial no que renovamos os nosos compromisos con Xesús, queremos coma EL facer da fe o camiño de liberdade para achegarnos a Deus Pai. Dicimos:

♪ **Creo, Señor, pero aumenta a miña fe**

Monitor/a:

Crede en Deus, no Deus que é Pai e Nai,
creador do ceo e máis da terra,
que pon nas nosas mans
o facer do mundo un fogar acolledor?

Creo, Señor, pero aumenta a miña fe

Crede en Xesús, o seu Fillo Benquerido,
que viviu nesta terra decidindo libremente
estar á beira dos necesitados dándolles unha man?

Creo, Señor, pero aumenta a miña fe

Crede no Espírito Santo,
que nos alenta para sermos coherentes
no camiño de facer vivo e crible o evanxeo?

Creo, Señor, pero aumenta a miña fe

Crede na Igrexa,
comunidade que vive nos feitos as palabras de Xesús,
sendo responsable nas decisións que se toman,
e capaz de pedir perdón polo mal feito?

Creo, Señor, pero aumenta a miña fe

ORACIÓN UNIVERSAL

Celebrante: *Oramos a Deus que nos chama a ser libres e coherentes nas decisións que tomamos con respecto á vida de fe e de relación cos outros.*

Dicimos: **Señor, pómonos nas túas mans**

Monitor/a:

✓ Grazas, Señor, por propoñernos libremente camiños que nos levan a dar unha man para loitar contra todo canto empobrece e oprime. Oremos

✓ Grazas, Señor, porque segues a confiar en nós dándonos a capacidade de elixir e optar crendo e confiando no mellor do ser humano. Oremos

✓ Grazas, Señor, porque nos axudas a tomar conciencia das nosas limitacións, facéndonos caer na conta de que ser libres non é facer o que un quere. Oremos

✓ Grazas, Señor, porque nos alentás para tender pontes, para derrubar muros, para acoller e agarimar. Oremos

✓ Grazas por todas as persoas que están dando unha man en Turquía e en Siria nestes momentos tan duros. Oremos

Celebrante: *Señor, escoita as nosas pregarías e énchenos do alento que te levaba a achegarte e ofrecer o mellor aos demais. Ti que vives e reinas por sempre eternamente. Amén.*

3.- OS SIGNOS DA COMUÑÓN CON DEUS E COA COMUNIDADE

NOSO PAI

Celebrante: *Oremos coa pregaría do Señor, deixándonos encher do seu amor e sabendo que somos libres xunto cos nosos irmáns. Rezamos atopándonos co Deus Pai que está doído con todo o que lle pasou a eses pobos de Turquía e Siria. Rezamos así a Deus que se doe con nós: NOSO PAI ...*

SIGNO DA PAZ

Celebrante: *As nosas mans tendidas uns para os outros expresan a nosa vontade de ser coherentes nos feitos; con corazón de irmáns e irmás, na liberdade de procurar un mundo mellor, e na responsabilidade da fe, desexámonos o mellor na paz uns para os outros.*

COMUÑÓN

Celebrante: *Compartir hoxe a fe é anticipar a nosa participación na mesa do Reino, comprometendo a nosa vida en construír un mundo non de escravos senón de homes e mulleres libres.*

Ditosos nós por compartir coma comunidade este pan do Señor.

Señor, eu non son merecente de que entres no meu fogar, mais unha palabra túa abonda para me salvar

CANTO nº 43 Non vou só

4.- AVISOS E DESPEDIDA

ORACIÓN FINAL

Celebrante:

Señor, seguros da túa bondade,
Ti fixeches que compartísemos
esta celebración de vida e de fe.

Fai que busquemos sempre aquelas realidades
que dan un verdadeiro sentido ao noso vivir.

Pedímoscho a Ti que vives e reinas con nós
por sempre eternamente. Amén

*Hoxe queremos asumir a responsabilidade das
decisións que tomamos.*

*Que as nosas obras mostren de verdade que queremos
imitar a Xesús e así facer crible o evanxeo,*

*Tamén queremos achegar a nosa solidariedade doída
aos pobos de Turquía e Siria. O recaudado nestes días
vindeiros porémolo en mans de Cáritas de Tui-Vigo para
achegarllo a todas esas familias e pobos que sofren.*

Avísase das misas (ver folla do mes)

*Que teñamos un bo día, unha boa semana,
e o Señor nos bendiga, † nos garde de todo mal
e nos leve ao seu fogar de vida eterna. Amén.*

*A lei antiga
en mans de Xesús é ...*



É AMOR

*Tedes oído que se vos dixo ...
pero eu dígovos ...*

Palabras de Xesús no evanxeo de hoxe